

LISTA BRZE PROVJERE

KAKO POSTUPATI KOD POZIVANJA U SLUČAJU TRAŽENJA POMOĆI

- Stanite i razmislite gdje se nalazite.
- Za pomoć nazovite telefonski broj vatrogasaca 123 ili 121. Ne računajte da su već drugi dojavili događaj.
- Počnite razgovor odmah govoreći polako i razgovjetno, šta se dogodilo, gdje se dogodilo, kada se dogodilo i ima li ozlijeđenih.
- Navedite tačnu adresu mjesta nesreće i osobno dočekajte pomoć.
- Budite spremni dati daljnje informacije i osobne podatke (ime i prezime).
- Završite razgovor kada vam služba koju ste kontaktirali to dozvoli.
- Vaš razgovor neće odgoditi upućivanje pomoći, jer pomoć može biti upućena i dok je razgovor u toku. Recite sve što ste zapazili, vidjeli ili čuli.
- Ne telefonirajte na liniji dok ne dođe pomoć. Služba koju ste kontaktirali možda će trebati dodatne informacije.
- Dojava nepostojećeg događaja je zakonom kažnjiva.

Program edukacije stanovništva za sprovođenje mjera lične i uzajamne zaštite građana

KONTAKTI ZA POMOĆ

Operativni centar Civilne zaštite (hitni slučaj zbog poplave/oluje)	121 www.cz.zdk.ba
Opasnost po život policija	122
Hitna pomoć vatrogasci	123
Hitna medicinska pomoć	124
PTT - informacije	1182/1188
BIHAMK (stanje i pomoć na putevima)	033 1282 www.bihamk.ba
Federalni hidrometeorološki zavod BiH (METEO ALARM by METEOBIH)	033 276 700 033 442 435 www.fhmzbih.gov.ba

UPIŠITE SLJEDEĆE BROJEVE:

- Vaša općina: ✍
- Vaša općinska služba CZ: ✍
- Vaš opskrbljivač struje: ✍
- Vaš opskrbljivač vode: ✍
- Vaš opskrbljivač plina: ✍
- Vaš upravitelj stambenog objekta: ✍
- Vaše osiguravajuće društvo: ✍
- Vaš porodični ljekar: ✍

Za više informacija slušajte lokalnu radio stanicu.
Frekvencija lokalne radio stanice: ✍



Bolje je osigurati se nego požaliti zbog toga



**JESTE LI
PRIPREMLJENI ZA
SLUČAJ POŽARA NA
OTVORENOM PROSTORU?**

ŠTA UČINITI U SLUČAJU POŽARA NA OTVORENOM?

Postovani sugrađani,
Mnogi su od nas doživjeli neki neugodan događaj pri kojem su trebali pomoć neke od specijalizovanih službi spašavanja. Ponekad događaj toliko snažno psihološki djeluje da je potrebno vrijeme za snalaženje i pozivanje pomoći. Ovi savjeti će Vama pomoći u tome. Proučite ih i sa njima upoznajte članove Vaše porodice, kako biste znali šta činiti u datom slučaju. Posebno je važno poučiti djecu, kako se zaštititi u opasnim situacijama. Lični primjer odraslih prema ovoj problematici od ključnog je značaja za ovladavanje i prihvatanje sigurnosnih mjera lične i uzajamne zaštite građana, član 41. Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“, br.39/03, 22/06 i 43/10).

JESTE LI PRIPREMLJENI ZA SLUČAJ POŽARA NA OTVORENOM PROSTORU?

Planirajte slijedeće sa cijelom porodicom:

1. Napravite Vaš Plan spašavanja i pripremite paket prve pomoći u hitnim slučajevima.
2. Očistite prostor oko svoje kuće, uklonite otpad i niske grane sa stabala preko kojih se može prenijeti požar na objekat.
3. Ne dopustite da se djeca igraju sa vatrom.
4. Spriječite bacanje i stvaranje divljih odlagališta otpada u blizi stambenih i gospodarskih objekata i šume.
5. Napunite mobilni telefon i stavite važne dokumente i novac u vatrootporne posude.
6. Planirajte kako upozoriti i ostale stanare u zgradi na opasnosti i kako se mogu zaštititi.

Za više informacija i pomoć u izradi plana za spašavanje u slučaju nevremena posjetite općinsku službu Civilne zaštite i website Kantonalne uprave Civilne zaštite ZDK
www.cz.zdk.ba

direktor Sead Džanović, prof.odb. i sig.

NE DOZVOLITE DA SE NESREĆA DOGODI!

POMOZITE STARIJIM I INVALIDNIM OSOBAMA!

ZAŠTITITE SVOJU PORODICU,
ŽIVOTINJE I IMOVINU!

KOMŠIJA POMAŽE KOMŠIJI!

POŽARI OTVORENOG PROSTORA

Dolaskom proljeća ili jeseni započinju i radovi na pripremanju poljoprivrednog zemljišta, uz koje je uvijek vezano i spaljivanje biljnog otpada i trave. Nažalost, tada se počinju bilježiti i događaji gdje uslijed nepridržavanja propisanih mjera zaštite od požara od strane onih koji to rade, dolazi do nekontrolisanog širenja vatre i nastanka požara otvorenog prostora. Ti požari naručito su opasni kada je vegetacija suha, kada su visoke dnevne temperature zraka i kada duva vjetar, jer se mogu proširiti na šume, stambene, gospodarske i druge objekte. Požari otvorenog prostora mogu prouzročiti značajnu materijalnu štetu i nažalost, smrtno stradanje ljudi i životinja.

ŠTA TREBA PODUZETI DA SE SPALJIVANJE NE PRETVORI U POŽAR OTVORENOG PROSTORA?

Vi trebate znati, da najdjelotvornija zaštita da se vatra kod spaljivanja ne proširi na druge površine i objekte i ne pretvori u požar otvorenog prostora je poduzimanje propisanih preventivnih mjera zaštite od požara, a posebno:

- Prijaviti profesionalnoj ili dobrovoljnoj vatrogasnoj jedinici dan, mjesto i početak spaljivanja,
- Spaljivanje obaviti na sigurnoj udaljenosti od drugih površina i objekata,
- Udaljenost od šumskih površina ne smije biti manja od 150 metara,
- Ne smije se spaljivati uz željezničke pruge i javne prometnice, trase plinskih i elektro vodova, u blizini stambenih, industrijskih i drugih objekata, koje bi vatra ili dim mogli ugroziti,
- Spaljivanje treba provoditi danju, za mirna vremena,
- Hrpe za spaljivanje trebaju biti male, ne više i šire od 1 metra,
- Prije početka spaljivanja izolirati površinu na kojoj se vrši spaljivanje od ostalih površina, u krugu najmanje tri metra,
- Osigurati stalnu prisutnost dovoljnog broja izvršioca spaljivanja koji moraju biti punoljetne osobe,
- Oko mjesta spaljivanja treba pripremiti odgovarajuća priručna sredstva za gašenje ostatka vatre (lopatе, kante s vodom i dr.)
- Mjesto spaljivanja i ostatke vatre je obavezno nadgledati i u potpunosti ugasiti.

ŠTA, AKO IPAK DOĐE DO POŽARA?

Kod požara na otvorenom prostoru, od najvećeg je značaja vjetar koji vlada za vrijeme razvitka požara usljed strujanja svježeg zraka, a takođe i zračenja toplote, koja ide na sve strane. Požar na susjedne objekte može se prenijeti vrelim požarnim gasovima, zračenjem toplote, iskrama, varnicama ili zapaljenim komadima gorivog materijala koje vjetar može prebaciti i na veliku daljinu. Zato:

1. **NE PODLIJEŽITE PANICII!**
 - Ostanite smireni kako bi pravilno procijenili nastalu situaciju! Djelujte oprezno ali bez odgode.
 - Utvrdite smjer širenja požara i pokušajte spriječiti da se proširi na susjedni zapaljivi i gorivi materijal.
2. **POKUŠAJTE LOKALIZIRATI POŽAR**
 - Aktivno se uključite u gašenje početnog požara, koji se mogu efikasno ugasiti vodom, zatrpavanjem zemljom ili udaranjem granama po žarištu vatre ili specijalnim metalnim metlancama.
 - Budite uvijek oprezni o vlastitoj sigurnosti i mogućem odstupanju, imajući na umu da će te moći ugasiti samo male požare u početnoj fazi.
 - Vaš osnovni zadatak je, da se požar zadrži u granicama u kojima će se postepeno sam ugasiti.
 - Izbjegavajte udisati produkte izgaranja, većina ljudi strada usljed gušenja ili trovanja produktima izgaranja. Zaštite otkrivene dijelove tijela odjećom.
 - Gasite požar niz vjetar sa sigurne udaljenosti, sve dok procijenite da morate zvati vatrogasce.
3. **ŠTA U SLUČAJU UGROŽENOSTI?**
 - Ako vatra izmiče Vašoj kontroli, obavijestite vatrogasce. Evakuirajte djecu i starije osobe
 - Ako je kuća sigurna od požara i ne postoji mogućnost paljenja krovšta, ostanite u objektu, s tim da zatvorite prozore kako dim ne bi ušao u unutrašnjost objekta.
 - Vodom navlažite objekat i okućnicu, uklonite gorivi materijal oko kuće (granje, korov i rastinje).
 - Napunite što više posuda s vodom i stavite ih na dohvata ruke.

4. PRVA POMOĆ

- Ukoliko ipak trebate proći kroz zadimljenu zonu gdje postoji utjecaj topline, dobro procijenite da li će te moći doći do sigurnog mjesta. Obucite vunenu ili pamučnu odjeću natopljenu vodom i visoku obuću.
- U slučaju trovanja dimom ili plinovima osigurajte unesrećenom udisanje svježeg zraka. Onesvještene osobe okrenite na bok, da nebi došlo do gušenja.
- U slučaju opekotina pustite hladnu vodu da teče preko opekotina (5-10 min.) U slučaju većih opekotina stavite sterilnu gazu na opeklinu i pozovite hitnu pomoć.
- Imajte uvijek na umu da postoje osobe jako osjetljive na dim: djeca, trudnice, starije osobe, te osobe kojim je potrebna posebna medicinska pomoć.

5. BUDITE PRIPRAVNI!

Neke stvari koje već sad možete učiniti kako bi se spremili za neočekivano, uradite odmah:

- Vaš Plan spašavanja u hitnim slučajevima.
- Pokušajte kompletirati svoj paket prve pomoći i prije nužde. Možda ćete se morati evakuirati veoma brzo i vjerovatno nećete imati vremena za traženje stvari ili ići u prodavnicu za njih.
- Uradite li to zajedno sa članovima Vaše porodice prije nepovoljnog događaja, Vi ste spremni za reagirati u hitnim situacijama.

6. VI SIGURNO ZNATE, A DA LI ZNAJU I DRUGI?

- Da u šumama i na šumskom zemljištu, kao i na drugom zemljištu na udaljenosti do 150m od šume nije dozvoljeno loženje otvorene vatre.
- Da u šumama i na šumskom zemljištu namjenjenim izletištim, može se ložiti samo na određenim i obilježenim mjestima i da je **ljeti paljenje bilo kakve vatre strogo zabranjeno**.

Za nepoštivanje propisa o zabrani loženja vatre na otvorenim prostorima policija podnosi prekršajne prijave, gdje su kazne od 100 do 800 KM. Ukoliko je paljenjem vatre nastala veća šteta ili opasnost po ljude, protiv počinitelja se podnosi krivična prijava, gdje su kazne zatvora od 1 do 10 godina.

PAŽNJA NIKAD NIJE NA ODMET!

Pripremljenost od požara može smanjiti štete i Vama i zajednici i zato:

- Pripremite se za slučaj požara na otvorenom Vašim Planom za hitne slučajeve i Kompletom potrebnih stvari u hitnom slučaju i razradite načine gašenja manjih požara sa punoljetnim članovima obitelji.
- Pratite informacije i vremensku prognozu.
- Strogo pazite na moguće uzročnike požara, kao npr. neugašene opuške cigarete, iskrenje, lug iz peći, neispravne električne vodove i sl.
- Educirajte djecu o mogućim opasnostima igre sa vatrom i požarnim opasnostima.
- Od kuće uklonite zapaljiv materijal.
- Upozorite inspektore zaštite od požara Vaše policijske uprave ili civilne zaštite na nedovoljne preventivne mjere zaštite od požara u Vašoj okolini.
- Ukažite upraviteljima, vlasnicima i korisnicima objekata na neispravne protupožarne aparate, unutarne i vanjske hidrante ili druge sigurnosne mjere.
- Osigurajte kod osiguravajućeg društva Vašu imovinu od osnovnih rizika: požara i udara groma, oluje i grada (tuče), poplave i bujica, klizanja tla i odronjanja, izlivanja vode iz vodovodnih i kanalizacionih cijevi.

Okupite svoju porodicu, razradite i ponavljajte svoj plan. Sa Vašom djecom kroz igru, kviz znanje, provjerite da li su zapamtili šta im je činiti u slučaju požara na otvorenom prostoru

Računajte na to, da će te možda biti prisiljeni jedno vrijeme, dok dobijete pomoć preživljavati sa hranom, vodom i ostalim potrepštinama koliko ste se sami za tu situaciju pripremili. Također, svi ukućani trebaju biti upozoreni i znati postupke ponašanja u slučaju požara. Lokalni dužnosnici i ostale službe spašavanja će biti na sceni nakon nepogode ali ne mogu doći svima odmah.

Ova knjižica je informativnog karaktera i nije namjenjena za čitanje prilikom nesreće, jer tad date informacije i upute morate znati sprovesti, ako želite spasiti sebe, Vašu porodicu i prijatelje.

**DA LI STE VI SPREMNI ZA SLUČAJ PRIRODNIH NEPOGODA?
UKOLIKO NISTE. ČEKA VAS...**